

UNITÂT NAZIONÂL E FEDERALISIM

L'unitât nazionâl no je une cuestion che e rivuardi nome la Italie, che e stei tal cjâf nome al guvier talian e ai patriots talians. E je une cuestion che dutis lis nazions a scugnin tignî di voli e che dutis a cîrin di difindi. Ma cuale nazion, cuai oms politics la difindino cui criteris unitaris dai talians? Indulà si crodial che un ordenament aministratîf come chel talian al sedi util e necessari par salvâ la unitât, massime se la nazion e je stade imbastide îr tirant dongje un mosaic di piçui stâts diferents tra di lôr par tantis robis?

Dutis lis nazions di gnove formazion a son implantadis su la base dal federalisim, e ancje cualchidune di chê vieris: e nissune di chestis si è sintude in pericol sul cont de sô unitât. Nome la Italie... e la Turchie a crodin di stâ adun in grazie di un ordenament mostroûs.

Al è a moments un secul che al è stât començât a aplicâ chest criteri cu lis regjons talianis. Cun ce risultât, pe cause de unitât? Cul risultât che vuê la Sicilie dai "Mille", la Sardegna "fedelissime", la Valdoste de dinastie Savojarde, il Trentin dal "irredentismo" e il Friûl "sentinele di Rome", a cirin di discjanâsi fûr plui che a puedin di chel cjadenaç. Si puedial dî cussì ancje de Svuizare, dal Brasîl, dai Stâts Unîts, dal Messico che a àn vût pursì vueris e pericui? E l'Austrie ise lade in grum par colpe dal so ordenament autonomistic come che al sperave Mazzini? E la Gjermanie ae cjapadis chês vuadulis che la fasin cainâ cumò, cuant che e jere une federazion di tancj stâts scuasit independents?

Denant di chescj faliments cemût si puedial in buine fede invocâ come indispensabil la conservazion dal ordenament talian par amôr de unitât nazionâl?

Cjalait un fregul plui in là dal nestri confin, siôrs studiâts, e imparait a resonâ sul teren positîf de realtât e no daûr di pregiudizis teorics che no àn nissun fundament.

pre Bepo Marchet - Patrie dal Friûl 1947